

■ CONVIVENZA

# Anc adina cool

DA PIEDER CAMINADA\*

**A**datg, questa dumonda a semesters pli vegls: As regardais Vus anc da Vossa emprima platta da 33 girs? Jau schont. Quai è stà l'entschatta dals onns settanta, cura ch'il postin ha purtè en chasa in pachet plat da BRO Records, en il qual sa chattava l'album «Meddle» da Pink Floyd. Mia emprima platta da vinil che jau hai spargnà ensemen cun mes daner da satg adina in zic memia cnap. Pertge che jau ma regord anc uschè precis da quai? Primo, perquai ch'igl è stada mia emprima platta, e secundo, perquai ch'ella è restada intgin temp mia sulletta – uschia ch'ella girava trasora sin mes plat dal grammofon. E girava e girava e...

**P**laun a plaun èn vegnidas tiers insaquantas ulteriuras plattas. E pli tard adina dapli. Cura che jau lavurava a Turitg svutrava jau durant la pausa da mezdi en ils regals da las fatschentas da plattas dal conturn. E cura che jau gieva a chasa la saira tegneva jau fitg savens enta maun ina tastga da plastic cun in cuntegn ch'ins pudeva engiavinar senza pli grond sforz spiartal. Quai è ì vina-vant uschè ditg fin che sa chattavan en mes regal var 500 plattas da vinil – e fin ch'il disc cumpact ha terminà l'era da vinil detg abruptamain. Tgi che vuleva esser «up to date» l'entschatta dals onns otganta e preferiva da tadlar musica senza il schluppinar tipic dal vinil, quel cumprava da qua envi CDs.

**P**ertge che jau raquint gist oz plain nostalgia dals temps passads? – Perquai ch'ils temps passads n'èn betg passads. Els paran schizunt d'esser pli actuals che mai. Ils 11 d'avrigl sun jau



stà al concert da Bob Dylan a Turitg. Betg per l'emprima giada. Ma per l'emprima giada sun jau daventà conscient che Dylan n'è betg la musica da mia generaziun. Dylan tutga a tuts – e vegn tadlà da tuts.

**U**schia er al concert en il stadion da halla a Turitg. Duas retschas davant mai seseva in um pli vegl ch'era franc gia in giuven creschì cura che Dylan ha edi anno 1962 ses emprim album. E gist sper el seseva ina dunna fitg giuvna che pudess esser stada sia biadia. Ed ella n'era dal tutfatg betg in'exceptiun. Mai e pli mai n'avess jau pensà che la musica dad in um da prest 77 onns possia carmalar tants giuvens en il stadion da halla – e quai notabene per pretschs che correspundevan cun ina differenza d'in pèr francs a quai che jau guadagnava per mais durant mia scolaziun mercantila. Pia ina summa, cun la quala jau avess pudì cumprar da lez temp en ina giada almain set fin otg plattas da vinil.

**P**lattas da vinil. Era quellas èn – almain per part – puspè en moda tar ils giuvens, gist tuttina sco Bob Dylan. Jau enconusch en il fratemp intgins giuvens che na chargin betg pli giu musica da l'internet, ma che cumpran anzi anc plattas da vinil genuinas. En la Gronda Britannia fan ins oz per part schizunt dapli svieuta cun la

venta da plattas che cun telechargiadas da l'internet.

**S**che Vus inscuntrais pia proximamain in giuvenot cun ina tastga da plastic che vesa or in zic suspectusa na sto betg esser lien il novissim jeu da computer. Forsa ha el simplamain cumprà ina platta da vinil. Ed il cool londervi: il giuvenot sa senta cool perquai ch'el fa insatge che auters da sia vegliadetgna na fan betg exnum. E jau ma sent cool perquai che jau fatsch cun tadlar «Meddle» giu da vinil anc oz insatge che blers en mia vegliadetgna na fan gia daditg betg pli. Perquai ristg jau ussa tut immodestamain ina pretaisa: coolness n'è betg ina dumonda da la vegliadetgna. Be ina dumonda da la perspectiva (persunala).

\* Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.

## Vocabulari

sa drizzar a	– sich richten an
platta da 33 girs	– Langspielplatte
postin	– Pöstler, Briefträger
daner da satg	– Sackgeld
girar	– sich drehen
plat dal grammofon	– Plattenteller
svutrar	– stöbern
engiavinar	– erraten
sforz spiartal	– geistige Anstrengung
schluppinar	– knistern
pli che mai	– mehr denn je
biadia	– Enkelin
carmalar	– locken, anlocken
chargiar giu	– herunterladen, downloaden
anzi	– im Gegenteil, vielmehr
svieuta	– Umsatz
telechargiada	– Download
lien	– darin
immodestamain	– unbescheiden
pretaisa	– Behauptung

Unterstützt von der Lia Rumantscha



Lia Rumantscha